

本朝分省人物考

人物考目錄卷之九十七

青州府

王讓

杜澤

崔廸

楊辛

王璉

焦瑾

劉福

李柰

馬愉

劉珩

張翰

劉或

石瑛

陳達

李旻

趙鑑

陳清

王琳

韓翊

高昱

公勉仁

石存禮

蔣暘

馮裕

黃卿

陳經

楊應奎

李舜臣

朱潤

朱延年

冷起元

程紳

石茂華

馬文煒

馮惟訥

張時

曹凱

孫鏐

王基

朱伯華

公家臣

朱鴻謨

補遺

武衡

陳松

韓必顯

馮琦

本朝京省人物考卷之九十七

山東青州府

王讓

王讓字宗禮山東青州府益都人幼勤敏端恪讀書日積寸馳聲庠序間事親有孝行嘗廬墓致涌泉之應洪武末由鄉薦授國子學錄施教以孝爲先文藝書翰皆在所略諸生有以罹艱告者讓一聞涕淚輒下以故多所感化永樂十年八月癸酉文皇帝特簡侍皇太孫讀書大司成胡儼薦讓孝行上謂侍臣曰孝者有行之原朕聞讓孝於其親故擢用之

讓在講筵首陳堯舜之道惟在孝弟人主躬行孝弟
則天下感化不勞而治每談經必端凝拱立敷宣明
暢 皇太孫敬而愛之時同事之臣陳山張瑛以順
旨被寵戴綸林長懋則強諫不少詭隨惟讓謙卑自
牧簡默寡言每進規諷亦委曲切中事情 皇太孫
欽容聽之益加禮重及扈從北行常被 召見厚加
賜予十八年九月甘泉縣學教諭張昱東阿縣學韓
岫永年縣學教諭劉順皆被 簡擢爲國子博士侍
皇太孫讀書讓雖先進以官序折節下之意每恬如
也二十二年始陞北監助教洪熙初 皇太子正位

東官讓進左春坊庶子未幾宣德改元以輔導功首
陞讓爲吏部右侍郎山瑛及綸等皆居其次時讓同
官黃宗載負才學尚氣槩讓每退遜宗載遂和衷交
好日密居部二年因浙江秋租負欠積多命督理未
幾卒於官時七十四讓言若不出諸口而褫身素履
人所不及游歷榮顯恭儉若布衣時爲上簡注未嘗
矜耀忠亮清介始終如一士林重之

杜澤

杜澤青州沂水縣人洪武中以文學授沂水縣學訓
導二十年侍臣薦其經明行修陞司經局試較書二

十五年進詹事府丞澤朴實持重言動不踰禮 上
嘉之二十九年正月特陞吏部尚書首定朝覲之制
以辰戌丑未年爲期往年一歲一朝之制俱革 上
令魏國公徐輝祖及禮部翰林院官詣國子監考試
師生甄別高下令澤以次錄用又奏定在京官員府
州縣首鎮官員考覈等第及撥歷司吏俱從各衙門
大小均分除授品職澤掌銓慎守不欺 高祖信任
後以年老致仕

崔 廸

崔廸字惟吉益都人家世業儒通貫經史長于理學

至正末 高皇帝嘗幸其家廼敬事焉洪武初召授
青州府儒學訓導轉益都教諭擢左春坊左贊善謝
病歸乞以教諭終其身賜之誥命白金文綺龍頭拄
杖一品服色以寵異之

楊 辛

楊辛高苑人洪武中以歲貢知臨漳縣事適漳水泛
溢城郭淤陷民被其害辛爲巨筏數百民渡於高阜
全活甚衆水患旣息民相率詣縣拜曰吾民得活者
公之力也辛曰禦民之患吾分內事何以謝爲後徙
縣治建學校皆其規畫民利而思之

王璉

王璉字器之荅州日照人學通經史長於春秋初任教授謫遠方洪武末以賢能薦授寧波知府清儉律已平易近民杜私謁革吏弊每夜四鼓升堂秉燭讀書聲聞於外或卽詣學課諸生諸生必三鼓赴學無間泮池舊惟一石梁乃捐俸增建左右二梁以崇偉觀遇驟雨必躬詣學巡倉視其漏濕輒用蜃灰識而葺之毀諸淫祠或以殃譴爲戒璉曰如其有靈宜降割我躬不他繫也政教兼舉德化大行五邑變俗自奉儉約一日饌用魚肉璉大怒謂內子曰汝尚不識

吾意更不憶食草根時邪命左右撤而痊之人稱埋
羨太守時武職橫暴璉痛抑之洪武壬午靖難兵起
璉造船欲航海勤王軍衛以怨故縛詣請罪賴宥釋
還鄉璉之去任也行李蕭然父老追贐堅卻不受寧
民至今稱之

焦璉

焦璉諸城人父汝霖永樂初被薦留京思念二親怏
怏成疾璉方弱冠在側卽慨然陳情乞身代留上矜
其孝行賜允明年授璉濬縣稅課大使通商利民署
縣事尤得民心秩滿保陞知縣事後改贊皇濬與贊

皇之民交章爭留上方以黃巖難治得瑾甚喜特進
六品俸知黃巖務以德禮化人刑奸禦暴境內翕然
有麥秀兩岐字生三男之異後致仕民爲肖像祀之

劉 福

劉福字慶之益都人宣德間進士授戶科給事中正
統間上章言 英廟駕迴當復位不合時論外補陝
西叅議陞山西叅政以疾致仕持正守介歷任三十
餘年家無遺貲人咸重之

李 柰

李柰字時珍蒙陰人永樂庚子鄉薦第二宣德丁未

進士除行人擬南道監察御史柰持風裁糾舉不避
權要尤貪惡暴有王御史納賄柰按之或曰同僚盍
少假柰曰御史爲朝廷執法不敢以親廢況同僚耶
工部王員外贖貨爲人所訐卒按如法刑部徐郎中
素刻深有法不當死者竟杖殺其母子一人徐與柰
有舊冀得寬假卒以酷刑坐罷人號爲鉄板李御史
蘇豪民擊人碎其首而死柰鞠之獄具豪以尸無傷
弗承柰厲聲曰汝殺人陰易其骨將誰欺耶豪色動
一訊而伏蓋賂守尸者以他骨易之也衆驚爲神囚
婦王季奴隨夫罰役北京夫道亡季奴携幼子還巡

司謂其殺夫也季奴不勝拷掠遂誣服械送法司將棄市柰監刑閱其案不見夫體所在且察其容色甚戚問曰得無冤乎季奴泣曰冤分一死耳若求平反必更加拷掠又不知幾死也柰疑之不忍行刑同事曰法司已有成案柰曰死者不可復生柰何局于成案而輕殺人後于他所獲其夫季奴得不死時張都憲凡滯獄弗決者必以屬柰吏見有柰署字不更視曰李御史所錄必無冤也丁卯補陝西叅議明年督理河西邊儲及代會邊報惡代者逗遛不敢進或勸趣車過河避柰曰吾荷國恩叨寄一方今有警宜以

死報柰何去之竟候代者至乃還陝西虜勢猖獗命
臣防守衆憚行柰獨請往曰主憂臣辱今國家多難
正臣子盡節之日可避勞耶偏頭關戍卒乏食衆恐
虜騎突入亦規避柰復請往修繕防守一方以安慶
陽民苦饑有司不敢發柰曰民以食爲天爲民父母
忍坐視其死耶卽令發賑之民有逋賦積歲不完有
司嚴刑督之柰曰民困故不能輸耳柰何以刑解其
縛從容諭之同官曰彼頑民督促之且不肯輸顧寬
假之彼肯輸耶民感極轉相語曰此吾父母也可不
勉而使之貽譏誚乎爭假貸以輸卒無負者由是西

人號爲李佛叅政孫毓田戲曰君爲御史人號鉄板
今爲叅議又號李佛何前剛而后柔乎柰曰御史尚
彈壓叅議貴撫循官固不同政亦有異可一槩施耶
景泰壬申才逾六十上疏乞歸家居十年易簪之際
神氣不亂生平孝友賙卹鄉人嚴剛負京租罄所有
代輸之嚴貧不能償止一女欲歸爲侍婢卻不納出
券焚之其女後嫁良家子柰沒女哭盡哀如喪父母
鄉有鉅豪少以不義致富晚年愛禮賢士慕柰柰辭
不往或隘之柰曰君子不飲盜泉之水況不義之人
何可往其物何可受耶嘗使藩邸外國賜遺一無所

受道經順德里人時爲郡守見所持囊中意必遠方珍物探視之乃黃連數裏蓋數苦目疾爲之備也致仕歸所積不足克道里費身後惟遺書數千卷而已

馬愉

馬愉字性和山東臨朐縣人宣德丁未進士第一擢翰林修撰上嗣位初愉侍經筵尋陞侍讀宣宗實錄成陞侍讀學士正統五年奉詔入閣預典機務十年陞禮部右侍郎兼侍講學士晨起趨朝得疾什不能語上命醫往視越四日卒年五十二上深嗟悼賜棺槨賻鈔萬緡命有司歸喪營塋贈禮部尚

書兼翰林學士舊例無贈兩官者贈兩官自愉始愉
端重簡默不設誠府兩考會試盡心擇才爲文章不
務雕斷論事不苟爲異同自處澹如門無私謁人稱
篤厚長者云

劉 珣

劉珣字叔溫山東壽光縣人生而穎悟氣識豪邁八
歲能文章書過目輒成誦有老人相曰是見面有文
類丞字後必爲相初赴鄉試道經臨清值河溢僕馬
俱溺珣獨水行半里餘神色自若咸異之舉正統十
三年進士改翰林院庶吉士授編修景泰七年修寰

宇通志成陞修撰天順元年陞春坊右中允進講
東宮凡義理精微閭閻疾苦與前代治亂之由皆懇
懇言之無少諱八年 憲宗登極以官僚舊臣陞太
常寺少卿兼侍讀成化三年修 英廟實錄成陞太
常卿仍兼侍讀明年陞兼侍讀學士八年丁母憂歸
廬墓側鄉人化之號其里曰仁孝服闋復任十年陞
吏部左侍郎仍直經筵日講珣每進講直言正論動
數千言而聲吐洪亮音節頓挫聞者敬悚 憲宗愛
而重之大學士劉定之稱爲講官第一在吏部不徇
私請亦不爲苛細矯激之行十一年陞兼翰林學士

人內閣凡軍國重事直前果斷略無忌天下陰被其惠至於大制作多出其手十三年陞戶部尚書兼職如故十四年加太子少保兼文淵閣大學士十八年修文華大訓成加太子太保進階光祿大夫柱國二十一年奸人李孜省輩左道亂政欲搖國本翊毅然抗言無少避邪謀遂阻然竟不能安于位或構爲飛語假優語以中傷之賴憲宗之明寵眷不替是年以親老乞歸賜賚甚厚家居十餘年事父愉婉悠然自樂父歿哀毀致疾遂卒年六十五訃聞輟朝一日遣官祭塋如例謚文和嘉靖間賜其里曰昭賢命

有司春秋致祭珙丰姿秀偉望之如神仙剛直英邁之氣久而彌甚蓋其質之所稟者純學之所養者正故居家爲孝子立朝爲忠臣一時宰輔少見其儷文章理完而氣充每下筆滾滾千餘言不竭尤工行草善吟咏有文集藏于家孫澄甫登弘治進士歷官監察御史

張翰

張翰安丘人孝友侃直潛心力學正統間由進士授廣東監察御史時毛中貴等怙寵恣橫人多側目翰在御前奏數其過因與給事中曹凱共擊殺之英

皇鼎罪且干柱上御書敢言御史張翰權貴咸忌嫉
之陞江西左叅議愧直道不行輒疏乞致仕家居授
徒講學室無環堵巡撫龔給官地裨築室以居貧約
恬靜至今鄉曲誦之

劉彧

劉彧字著章益都人正統己未進士授工部主事歷
郎中陞彰德知府持身正大約己愛民鄴人至今思
之居鄉恂恂不見喜愠之色學問醇實不尚浮華人
以君子稱之

石瑛

石瑛字文玉益都人由歲貢任澤州吏目朴直剛嚴
不詭隨於俗家世豐裕性好施遇歉作糜以贍邑里
全活甚衆後值瘟疫死者藁葬不給拾棺三百餘以
瘞老而無子者捐貲納室賴有後者十餘家造皮履
以施負薪作木桶以惠餅汲少年不作家產者則擊
以杖間里恒愛慕而嚴憚之其子銘孫存仁存禮曾
孫麒麟鳳琚鯨玄孫茂華繼節繼芳皆通顯人以爲
積德之慶云

陳達

陳達字兼善日照人天順中進士授主事出知懷慶

府境有巨盜達單騎往諭隨散有故人密以金託者
其人死召還其子鄉人以爲難及

李旻

李旻字同仁益都人天資聰敏英拔下筆輒數千言
尤精書法行草成化甲戌領鄉薦授同州守改潞州
決獄明敏廉潔自持黜貪吏革夙弊甚多疾篤乞休
進階四品服色瀕行藩王世子遣人持重賂來餽謝
日數年保婚常例不啻萬金是皆不受斯何爲哉聞
者歎服

趙鑑

趙鑑字克正山東壽光縣人成化丁未進士授知蕭
山縣在縣廉愛有惠政去後民思祠之擢監察御史
歷視馬政鹽法奉命按宣太時虜酋火篩犯境
朝命平江伯陳銳等帥兵討之師久不進上疏刻之
又陳方略甚悉於是兵將奮勇連戰皆捷虜爲遜去
爲御史久數推京寺要職值與逆瑾忤出知安慶旋
改順德瑾誅擢浙江叅政陝西右布政使正德八年
進右副都御史巡撫甘肅歲大侵上疏請出內帑賑
之及貸富商貨繒易粟隨所在給以糜粥全活甚衆
又令官給牛種勸之使耕次年遂大穰又浚渠招屯

募民益兵邊務大修又諭吐蕃復哈密奪地璽書嘉
勞十年改視南京院事復命十一年命清理閩浙鹽
法入視院事轉大理寺卿鑑於法比素精覈而宅心
平恕歷南京刑部尚書嘉靖二年改北刑部尚書命
芟治諸巨奸種種按伏咸得其情逆濠之變宗室坐
繫者衆上疏止坐元惡請釋其株連者獲全二百餘
人一日待漏直廬朝士有託以私者叱之曰此豈汝
等請托地耶聲色俱厲聞者壯之嘉靖五年致仕特
賜馳驛令有司給米四石歲夫六名及 陸辭上特
製詩一首書於龍箋以寵其行舉朝臣工咸嘆有此

奇遇卒贈太子太保諡康敏性好士樂善雖面折不
能容人之過而宿怒弗藏故人弗怨之臨事決議能
以二三語折衷靡不服學士石熊峰稱之曰清梗忠
實時以爲實紀云

陳清

陳清字廉夫益都人弘治間進士授戶部主事歷員
外郎中擢山西左叅政鄖陽都御史戶部侍郎陳言
三十四事清理馬房冗費一十八萬以工部尚書致
仕孫策以蔭當補官時冢宰清同年友也親友請爲
策致書公正色拒之剛介如此

王琳

王琳安丘人少孤事母甚謹及長雅負奇氣弘治間領鄉貢授武昌令政多惠愛民立祠祀之徙聞喜擢監察御史風裁凜然所過豪猾歛戢武廟嘗賜銀牌粟帛獎之後轉山西僉事以大同叛軍憤微而卒

韓翊

韓翊博興人由鄉薦令太康政多懋異蝗不入境民爲之謠曰欲要蝗不墮須是韓公過欲要蝗不災須是韓公來居官清慎常祿之外一無濡染貧約終其身

高 昱

高昱字孟昌青州左衛人家世襲武昱以儒顯幼事親承順顏色出入必告良辰佳節奉親嬉游以取適家徒四壁怡然自樂弘治甲子領鄉薦郡守宋公鑑見居室敝陋欲爲葺理昱力辭曰不敢以此病鄉人嘉靖甲申選兵部司務歷武選員外車駕郎中居官清約不可干以私卒之日大司馬張公率僚佐臨喪悼之各捐俸具棺襯歸葬家益窘幾不能存叅政楊公維聰置田以育遺孤其生平狷介不苟槩可見云

公勉仁

公勉仁蒙陰人弘治間進士授行人陞江西道監察御史太僕寺少卿正德初忤宦官劉瑾左遷四川叅議勦蜀寇有功累陞都御史巡撫大同值北虜寇邊公率衆力戰復振奇勲尋丁內艱家居武廟降勅崇禮獎勞服闋起巡撫治鄖陽卒于官

石存禮

石存禮字敬夫益都人年十九登弘治庚戌進士授行人陞南京戶部員外郎郎中出知紹興在郡凡四年刮剔民隱吏弊殆盡居無几何忤當道尋罷年尚未強也存禮質淳厚沉靜而剛方不詭所至以嚴見

憚人多忌之家居三十餘年惟課子耕讀爲務非公
事未嘗一接顯貴性不樂置生產每念以清白遺子
孫斤斤然有古人之風人呼爲萬石君家云

蔣 暘

蔣暘字文輝樂安人正德間進士知沐陽縣撫流移
勸耕種興學校飭兵防爲舜澤蘇祐所稱服已而擢
江西道御史糾彈無避督鹹河東再巡畿輔咸以歲
候爲民請賑貼危者諸方賴以全活平河青羊山寇
擒畿內妖術以千數時論偉之後爲權貴人中傷謫
守吉州創石城以衛民今祀名宦肖像學宮陞僉事

轉貴州兵備安置土官仇殺者貴州至今寧謐尋致仕以壽終所著有歸藏漫藁兩廵奏議

馮裕

馮裕字伯順臨朐人以先世戍遼東生于廣寧少孤貧刻苦讀書聞義州賀醫間先生倡明理學往師事之輒克然有得歸而事身心之學動靜語默雖細必謹身無積書借覽以資見聞精心經學雖箋注隻字必窮研洞豁然後以正德初舉進士授華亭令清慎正直名動一時時瑾竪煽禍邑人張文冕任近侍爲瑾腹心以家託之裕至邑一無所私庇冕怒愬于瑾

將連繫之裕知禍在旦夕畧不爲動已而逆黨伏誅
歷蕭縣令知晉州所至多惠政民懷去後之思遷戶
部郎出納一任法制數忤權貴權貴密遣人偵伺闕
失踰歲無所得乃益重之歎服再拜而去出守貴州
遷按察司副使後先七年屢建平蠻功有百餘年仇
殺者先是廷議數遣重臣按治不服給單車往諭之
一言而解酋長感泣夷兵悉散去南裔賴之安後解
官歸青州不治生產儼居十餘年力不能酬其直囊
無遺錙銖無儲粟弗問也性重厚剛介人不敢干以
私晚年端坐陋室手不釋卷與諸同志結社賦咏不

忘忠愛之念切憫之學嘗爲醫間先生集序疾亟猶
更定字義命筆皆正俄而正冠斂衽而卒歷官所至
著冰蘖聲旣歸出尤凜凜自守非義一毫不染子四
維健惟重惟敏惟訥俱登第人以爲清節之報云孫
琦吏尚書

黃卿

黃卿字時庸益都人正德間進士歷知武進涉縣遷
守應州所至皆以能稱陞南京刑部郎時有宸濠之
變叅贊大司馬喬宇籌畫賊賴以平擢守太原修廢
決滯五閩月而郡大理汾河決城將墊具詞祭告水

徙三里民神之陞浙江右布政忤時宰調陝西再遷
江西尋陞左布政卿爲正里賦寬息耗吏不能欺民
感其惠嘉靖庚子歲饑發帑賑之全活萬衆是歲十
月入覲中道卒平生嗜學老而彌篤雖隆冬盛暑不
廢覽閱有海岱會稿編茗集編茗詩話閒抄漫紀擬
珠集藏于家

陳經

陳經字伯常益都人正德間進士授兵科給事中謹
直敢言武皇末劾奏寧彬餘黨辭涉當路上覽疏
顧左右曰此髯給事中也經多髯故云世廟登極

擢通政司叅議歷通政使遷戶部尚書總理太倉清
謹獨持久之政禮部尚書尋轉兵部加太子少保時
西北警檄日至經殫心籌畫至忘寢食條上防禦事
上皆允行邊臣建議復河套經力陳其不可忤宰執
意因乞骸骨詔許馳驛致仕後起復爲戶部命下數
日而以訃聞上爲之輟朝諭塋祭如例經性方
介立朝垂三十年門鮮干謁卒之日囊無私遺有古
人之風

楊應奎

楊應奎字文煥益都人天性孝友厚重朗豁正德間

進士授仁和尹徵拜兵部主事轉禮部員外迎世
宗于湯陰進儀註賜御膳擢守臨洮刻祖訓以勵
俗甘肅驛站久疲奎極力調處民皆復業引洮水灌
田萬頃民利之有去思碑及調南陽值歲荒設法賑
濟全活數萬人又正陂堰以灌民田郡民感德爲立
生祠祀之而兩郡乘悉奎編纂平生博覽羣籍精工
右軍書法其高致雅操每以希文自期罷歸居鄉日
與縉紳結洋溪吟社容與林泉有吟稿并澠谷文集
藏于家

李舜臣

李舜臣字懋欽山東樂安人也生而清穎警敏日記
千言爲文雄厚不露鋒鏑已卯舉鄉試嘉靖癸未會
試石熊峰得其文驚異遂置第一今錄刻其策論不
窺一字廷試三甲第一授戶部主事調司勲陞司封
員外調考功權貴忌之復調戶部郎中時王慎中主
選得陞江西提學僉事考閱精審人才輩出陞南國
子司業與倫以訓鄒守益後先同僚雅相友善轉尚
寶卿日惟閉門讀書考究六藝陞應天丞均賦愛人
甚有惠政召還爲太僕卿以 廟災自陳致仕益時
辭思之也屢薦未起竟卒舜臣居官居鄉詳慎嚴密

嫉惡好善自奉儉約詩文各有古意晚年尤工所著有戶部符臺諸集

朱潤

朱潤字伯雨益都人登嘉靖丙戌進士除知巢縣有聲歷官南京戶科給事中彈劾不避權貴仕至松江府知府左遷寧波府同知卒于官性簡靖不阿自家居遠宦適人不見有喜怒之色沉毅多雅量善舉業文學所著毛詩四書通解凡若干卷足爲後進法程卒年四十有六人悼惜之

朱延年

宋延年字仁夫益都人幼奇穎從父宦遊讀書易水之上弱冠歸青州文名驟起以毛詩遊鄉校繼從安丘黃禎受春秋嘉靖丁酉魁東省善古文辭出入秦漢行誼高潔動以古道自持見重鄉評謁銓天曹當領劇職辭不就選魏縣教諭文章德望師範一方遷禮部司務留都縉紳傾心推服乙丑考績過青州展謁卒於家門人哀刻一川遺稿以傳

冷起元

冷起元字繼貞益都人嘉靖辛丑進士授內黃令簡靜嚴毅民不敢欺期年報政上官當道者罷之日非

百里才也時一按部者忌其才值移檄後他部啣之
曰吾終不令每軋已使我氣噎也竟爲飛語中傷之
稍遷太僕寺丞墨墨不得志數月以病免家居十餘
年杜門謝客口不談世務非公事司府不一謁也性
恬澹不喜紛華衣冠服用無異寒素鄉人重之生平
寡飲惟病寒乃飲少酒壬戌冬適公譙舉醕一再行
忽感痰火疾辭客歸家移晷而卒卒之日纔年四十
三云

程紳

程紳字伯書樂安人登戊戌進士授長治令擢刑部

主事考績陞陝西兵備僉事再補河南所至以平反廉能著聲稍遷山西叅議秋防邊境賴以無虞已而晉副使備紫荊關戎務竟以積勞致疾年五十二卒歷官居鄉從未以才智軋人今祀鄉賢

石茂華

石茂華字君采號毅菴青州益都人垂髫補博士弟子嘉靖癸卯舉省試明年第進士授濬縣知縣年方弱冠宰三輔大邑不事鉅擢而能得情實他邑有訟不決下濬治莫不稱平入爲戶部主事監督草場時大將軍驚用事奴客請芻譁不奉約茂華輒以法從

事驚頗銜之謂茂華書生畏事欲惛以軍興必輜重
先行無後爨茂華笑曰老兵虛喝耳趣召軍吏嚴裝
敬謝將軍郎出塞矣驚氣大沮終不敢出亦卒無柰
茂華兵罷擢揚州知府會倭寇踰淮江北騷動練簡
土兵城守甚設幸臣趙奉命視師部使將吏爭餽遺
恐後趙謂揚天下膏腴地便宜發兵命守親出欲以
取賄茂華曰守臣職在城郭法不出境趙亦沮其後
倭寇再至皆敗走之上首虜數百級加秩一階遷山
西副使丁艱服除河南副使擢陝西叅政進廉使丙
寅拜右僉都御史巡撫甘肅轅門卒嘗以餉不時給

羣謀下車立殲其魁數人一軍懾服其後虜嘗一入發兵敗之上首虜數百級丁太母艱去位虜陷汾石朝廷求才臣往撫屬茂華虜入塞謀襲老營堡堡之黠卒私虜命副將郭琥以兵先入縛卒明日虜來城得以完虜退入爲兵部侍郎癸酉進右都御史兼兵部左侍郎總督陝西三邊軍務套酋要市諭以期約不使越額酋稽顙受約束羗夷作梗盜吏民馬牛道塞不通焚其部殲焉其旁七十一族皆請命爲外臣奏以詔賜晉兵部尚書開府如故無何以故官掌南京都察院謂太夫人老矣疆場稍寧敢以私請致仕

歸數年陝西督府闕朝議可任無踰茂華復起鎮焉
時饑草載道至人相食日夜露禱爲秦民請命果大
雨蠲賦發倉全活者數千萬居秦六月竟以積勞嘔
血卒于軍中將吏莫不流涕賜祭二壇贈太子少保
謚恭襄

馬文煒

馬文煒字仲韜號定宇青州安丘縣人煒生而白衣
重胞父惠異之語母曰兒有貴徵顧吾不久當舍兒
去再越歲惠果逝母茹荼撫煒六歲過里塾聞伊吾
聲請于祖就外傳稍長從季父受易嗜濂洛家言十

七補諸生丁母艱嘉靖辛酉舉省試壬戌成進士除
確山令折獄如神一日有捕盜卒磔死于塗卒母詣
訟有主名煒笑曰去我爲若跡之已從圍墻呼卒故
所捕盜李某訊于庭戒門者勿辟人人爭前睨煒遽
傳令闔扉盡訊諸闌入者中有三人眎李色動立叱
縛之具服故李使殺卒者也某子甲與人共販夜行
澤中殺而奪之錢詭言中盜煒察其色異下之獄使
吏給其母妻甲事露已自實奈何可惡持所奪錢來
母連坐母妻驚惧探米罌中錢付吏甲遂伏辜諸所
摘發多類此徵入爲監察御史按醴兩淮上便宜六

事報可積羨十餘萬俱抵正額商困乃甦請建運司
學文教以興請告起補廷評訊大辟政府有所欲出
煒勃然曰是嘗希相嵩指殺忠臣鍊并二子罪死且
不蓋何言出爲政府不懌煒竟用是出守德安猾吏
聞風重足立隨州守坐賕露按如法有要人爲請弗
聽俄要人拜楚中丞同官危之煒益發舒不少避中
丞竟無以難楚恭王薨嗣子在抱攝者謀奪國與妃
相訐奏諸司不能決檄煒入王宮問狀以片言折之
羣小伏辜嗣子得有國爲郡之明年城雲夢明年城
孝感絜郡中要害剏小店新河二鎮募卒置堠刀斗

相聞郡無萑苻之警置學田數千畝徙隨州學宮于
夷壇紳衿奮起至今頌之甲戌朝會上修先朝故
事表二千石尤異面勞慰賜煒名首列擢副使治兵
荆南一以惠文從事無所撓避江故有堤而囑煒重
築之堅實倍舊人呼爲馬公堤進左叅政備兵如故
歲大侵檄所司多方賑貸全活數萬萬計上遣中
貴爲江陵治第監奴橫行縛置于獄中貴媿謝乃已
陞按察使癸未入朝江陵已逝主爵知煒久淹卽拜
江西右布政轉左尋晉僉都御史巡撫其地以十事
要約長吏而臨江守某所箠殺平民甚多前中丞發

其罪下煒勘實竟伏法不少貸令豁民以均田窘其
俸丞因集亾命縱掠煒從數騎馳諭立解散之梟其
渠魁均其田民不敢譁革除死難諸賢練公安魯公
鳳韶輩久已褒錄而親屬坐戍如故特疏請解釋還
百餘人公論快焉然煒執繩頗嚴下不得逞乃嗾悍
宗數十譟而呼癸庚煒乞自罷 上譴削悍宗任煒
如故諸不逞益恨之往城孝感時嘗得古鼎一王元
美作記以爲此仲山甫鼎至是中者爲飛語入疏謂
煒以古鼎餉江陵不知鼎故在煒閣中未出也煒笑
指曰嘻而鼎尹昔負而要君吾今復負而要相乎聞

者絕倒有 旨聽改南京煒遂歸家居十八載對郡
國守吏語不及私爲鄉邑畫利病則纏纏不厭煒病
非走羣望禱者千餘人沒無少長皆流涕以萬曆癸
卯卒年七十有一子應龍從龍各以經冠東省壬辰
同舉進士

馮惟訥

馮惟訥字汝言別號少洲青州臨朐人嘉靖甲子領
鄉薦登戊戌進士除宜興令邑多大猾有逋賦至數
十年者訥至刺諸猾按籍而攝逋者賦大集以數萬
計郡守大奇之謂令纔弱冠乃老吏不如嘗督諸生

就試江陰巡江某以間行縣陽怒不候已而陰有所
覬訥弗應愈怒撫他事中訥調魏令會烽火徹郊訥
城雙井鎮備之遷蒲守魏人擁車不得發爲更定牧
馬法而去蒲劇多宗室一以容與治之晉丞維揚以
艱服除補松江遷南民部副郎壬子內艱復補北駕
部出爲陝西僉事兼督學陞河南叅議擢浙江學副
訥念兩浙海內嚆矢布教示先質後文之意十習翁
然歸正陞山西叅政進廉使廩然無所受私三晉號
曰神君晉陝西右布政秦多豪強錮屯田利不得稽
訥以法按搜伏田得萬餘頃轉江西左布政江省歲

輸瓷器吏緣爲奸訥令私出一錢諸盜才物者輕重
受刑遠近便之辛未入覲精覈下吏能否無所依違
部稱之曰諸方伯鑒然不存兩可者獨馮伯也訥名
益起咸以公輔期之而請老志堅疏上 天子特進
光祿寺卿予致仕歸而習靜遠囂爲終老計而天不
憖遺不踰年逝矣訥性孝友歷官所至皆奉太夫人
以行倥傯夜歸必候戶外問寢食然後退奔喪徒跣
數千里柴毀逾禮兄弟五人四登科第自相師友友
愛備至教育諸孤無異所生太史宗伯琦者卽仲孫
也訥仕宦三十年圖書詩卷外無長物督浙學時太

學士袁致書謝而不發幼服庭訓廉平爲理在魏有德政碑在蒲及隴右有去思碑在江右則士夫歎服謂二百年所未見小民人人肖像祝之所著有風雅廣逸楚辭旁註選詩約註漢魏六朝詩紀文獻通考纂要唐音翼杜律刪註馮光祿詩集行世

張時

張時字本逸蒙陰縣人由鄉薦署教諭事諸生中貧而有志者葺齋舍以居之時爲督誨嘗以俸資給其朝夕士益感勵奮學後多掇科第以去累擢刑科給事中以侃直不避權貴出爲順德守惠德善政不可

殫述九載稱天下廉平官第一陞山西參政順德民
伏闕奏畱詔以參政銜復蒞府事廉明勤謹始終若
一卒于官祠祀名宦

曹凱

曹凱益都人由進士選授給事中生平磊落多壯節
每誦昔日百鍊剛化作繞指柔之句則奮髯起曰天
下事鮮不壞於柔趨渙浚之流者挺挺直遂彈劾不
避權勢英廟北征陳諫甚力且曰今日之勢與宋
澶淵異彼當事者多忠勇而士馬勁悍今中貴竊權
人心惕玩彼輩不獨以陛下爲孤注卽徽欽懷愍

亦何暇恤乎聞者吐舌後果有土木之變凱慟哭竟日聲徹禁庭率同官執嬖倖壞政者踢殺之

孫鏜

孫鏜莒州人嘗爲掾曹負氣不羈習于騎射有四方志挾貲商吳越間嘉靖甲寅倭寇騷掠東南民懼荼毒松郡瀕海爲甚當事者思廣召募鏜倡義來謁具道願戮力殲寇及輸貲助餉郡侯方公嘉其志見之子叅政翁公大立試之藝超乘異倫所佩雙刀衆莫能舉運若飛翁公曰壯士親酌飲之遂以鏜往時官軍方陳而兵憲任公爲賊所窘鏜望見疾呼馳冒賊

圍脫任于難自使人還莒括其家遍募所結里中兒
爲已附郡人恃以無恐鏜氣亦倍有輕敵心無何賊
党從郭西燒民廬舟渡泲泲鏜奮袂起曰是可蹙而
擒也突出賊后逆戰竟日矢盡絃絕后援不至還及
石湖橋半渡遇有伏墮之鏜北人不習溺拍未抵岸
而賊艘四集矛刺其腹遂死死之日年三十四后軍
與其尸歸有司以禮收之道路歎歎多泣下者

王基

王基字啟亨號對滄青州人基篤志力學讀書數行
下爲文奇藻千言立就十五入郡庠嘉靖乙卯中鄉

試尚未冠也乙丑成進士授戶部主事督理通州馬房事多中貴阻撓督理不避勞怨差管太倉勾稽精密乾沒者不得逞歷員外郎中陞大同知府嘗有宗室大獄株連百人爰書至數萬言基晡審逮昏而罷奏成手中人皆不測以爲神明陞山西副使備兵河東陞叅政治蒲州一日河忽南溢且抵城聲如霆震城中驚號基設祭望水拜水旋止崩處見石堤橫亘建議接增之自城抵首陽之麓河自是不爲患蒲故繁侈婚喪富者踰制貧者效尤民間停喪不塋婚配失期者甚衆基嚴禁諭男長不婚喪三月不舉者治

之風俗大變乙酉陞蘇州兵備進浙江布政尋晉右副都御史巡撫大同時虜入貢每要賞格外火酋叛順親率師擒斬三百級既而虜又入犯遣兵擒斬二百餘級虜隨帖服嗣是諸將有掩撲要功者峻拒之曰通侯可倖忍以枯骨易功乎基自爲郎爲守及藩臬開府俱任邊塞馳驅二十餘年積勞成疾䟽請准回籍調理戊戌起南京刑部右侍郎攝兵工兩部甲辰陞南京戶部尚書總督糧儲兼右副都御史乙巳力請予告登舟行李蕭然圖書數篋而已丁未感風痰復以女孫節逝痛怛竟不起生平持身廉正人不

敢以私干撫大同日代王餉醢二髡詞曰此醇酎幸
自飲基弗知令吏受之將饗客使復來曰曩酒非常
酒也幸自酌勿飲人基乃知非酒嚴詞壁之一僧素
相識兵部時僧投一書白米四百石怪問之乃爲衛
官謀陞者大怒逐之去武進士高某十年不得調憐
其才陞之高具百金爲謝嚴叱拒絕基自幼孤事母
至孝鮮兄弟獨一姊嫁黃氏姊亾厚恤其家族人缺
乏鬻田助其婚喪諸生李者賣屋數楹見其貧折券
與焉卒于萬曆三十五年享壽七十朝廷遣官祭塋
贈宮保

宋伯華

宋伯華字汝含益都人爲文有奇氣年二十未隸學
官督學吳公覽其文異之選入試遂舉高第時嘉靖
戊午歲也後十年隆慶戊辰第進士授直隸河隄
大決漂沒民棲木不得食伯華流涕問天平民何罪
請以身當乃括鉞爲小舟就民計口舖之爲請
于上大發賑貸民忘其災召爲駕部主事歷員外
郎中擢淮安知府治法持大體不苟細以慮囚不
政府旨議歸久之起丞東鹿卽遷永平推官河南府
同尋拜開封知府伯華益務簡靜或謂宜有科指立

聲跡笑謝曰靖民之路不擾而已時已病力疾視事以萬曆乙酉卒于官舍郡吏民行哭悲吟如失慈母

公家臣

公家臣字共甫號東塘青州蒙陰人家臣聰悟絕人垂髫受書大父中憲公躋奎親督課之日誦數十萬言長從中憲公仕涉吳楚絕江漢而南至千百粵周覽山川聞見日廣歸補博士弟子雖儒宿咸謝不及也嘉靖辛酉舉省試第二隆慶辛未第進士選庶吉士萬曆癸酉授編修以母李孺人憂歸丙子服闋簡充會典纂修官丁丑分試南宮得雋爲多奏進世

皇實錄以勞賜金綺無何居父文林公一載憂時中
憲公在堂年九十高矣曾玄五世聚食以數百指家
臣爲冢孫仰奉大父俯聯羣從一如文林公時未幾
居中憲公憂服闋詣闕乃以辛巳大察調澤州判先
是家臣與吳中二太史善及江陵奪情二太史上書
江陵曰公生得無有疏二太史輿出潞河家臣遣子
鴈送焉偵者報狀以是相睚眦不能解且在禁近不
事與貴踈于將迎遂有是調然而家臣不自失也至
上黨日坐曹決事無少鞅鞅束帶謁大吏大吏咸不
自安使門下謝罷居半歲遷廣平推官讞獄持大體

不小苛癸未大計部使刺察郡吏實狀家臣曰某尚
不知其人何知長短竟不實狀御史按吏民多冤濫
白御史罷之已而 詔書禁如家臣指乃服其識江
陵敗人情洶洶不自安家臣奏記河中公曰今日之
事去其太甚而已河中深許其言以爲明達國體頃
之擢南戶部主事家臣故少病然體頗豐盎不耐勞
暑以六月南行至滁陽道渴疽發背數日遂不起爲
人坦夷不設城府多情誼尤好延接寒士周其緩急
天性孝友文林公晚病風痺在牀從一僕日侍左右
寒暑不離仲弟家翰病與同卧起調湯藥數年沒則

以子爲之後子也又繼又亾乃已諸子百家無不涉獵六書樂律天文醫卜之術皆鈎其要指而不以自名其詩文儻逸吐納羣言而不事模擬卒之日諸生請于部使俎豆學宮自上世代有簪紱及大父益顯文林公仕而家臣與仲父一揚相繼舉進士元子鴈登進士今官司成充兩朝實錄總裁

朱鴻謨

朱鴻謨字文甫號鑑塘青州人祖父五世單傳祖樸隱憂之日禱于神夜夢星如月落前楹而鴻謨生方五歲母程夫人棄世哭之哀非凡兒比十五補郡庠

督學穎泉鄒公夜夢虎吐明珠光輝灼天開卷得鴻
謨又姓朱大喜初名鴻基更定鴻謨絜入衙齋朝夕
討論學大進已巳遇超貢業心屬謨謨不至後問故
曰謨終不以師愛奪先輩榮名隆慶庚午鄉試第二
辛未成進士授吉安推官郡有要臣來干者出其書
示人要臣惕然久之亦與諸吉人相忌曰茲道義鄉
也匪吉誰容吾慙者丁丑大計有同僚陰蠱謨當路
不無少動吉孝廉百人咸聲言曰我公濂洛中人吉
數百年僅僅見此此而可議吾輩願叩九關矣議止
然僅授南道御史至方兩月會江陵不奔喪杖諸言

者謨杜門不飲食淚簌簌下李夫人數使女奴輩晉
食不御夫人泣曰親老家貧去牛衣幾何時而忘耶
推案曰無多言死矣草疏語語血誠讀者一字一淚
江陵欲逮之而中解以嚴旨勒歸謨跨蹇驢出畱
都人指歎曰小民無福真御史去矣歸隱手書壁曰
洋水樂饑讀天下書不談天下之事康莊擊壤生聖
人卅願爲聖人之氓去七年詔起故官旋丁父得
正憂起補河南道巡按江西晉光祿少卿轉太僕少
卿會議與重臣忤卽拂衣歸尋以詔起大理少卿
晉僉都御史提督操江巡撫應天會倭告急當事者

多屑越帑藏謨不肯妄支一錢曰吾安能以未至之
倭億久安之赤子久之倭不來吳亦不困遷刑部右
侍郎爲國守法法得公平戊戌病卒不能歛大司馬
某公等醢金始得具棺謨爲理六年衙舍雨注地不
可足以蓋支雨以屐涉者三年不問李夫人布衣蓬
首臧獲敝衣垢面如未嘗從宦遊者按江西歸薦者
厚幣走謝謨不受書諸來役不得勞多典衣還者爲
學務勿欺自大庭以及屋漏無墮容與人處一定交
終身不忘平居不談人短長聞人善喜動顏色見一
才推轂不容口其大節如此

補遺

武衢

武衢字廷亨山東沂水縣人成化二十年進士由行人選廣東道御史巡按淮揚以建言降通海王薄陞杞縣知縣汾州知州卒

陳松

陳松青州人進士官御史時分宜柄國同臺有非禮諂事者邀松偕竹松大詈遂拂衣起分宜聞而憾焉左遷秀水令刻意爲民鋤強扶弱邑有柄臣子弟奴隸橫甚松裁抑不少貸遷平涼二守去

韓必顯

韓必顯字用晦山東安丘縣人隆慶二年進士由洛川知縣選山西道御史萬曆元年以劾兵部譚尚書降湖廣布政司照磨陞廬州府推官累陞僉都巡撫陝西

馮琦

馮琦青州臨朐人生之夕祖母夢朱衣象笏者立于寢門之外曰余韓琦也今爲而孫寤而琦生因以命名萬曆丙子年甫十八舉于鄉明年遂成進士選庶吉讀中秘書與選者琦年最少而天藻掞麗器宇端

凝爲館閣大臣所推重已卯授編修奉 冊使於藩
藩時父子履備兵其地事竣卽衣賜服拜於其庭觀
者擠肩而進曰天朝使臣乃吾郎君也莫不榮羨之
丁亥陞侍講克經筵日講官 神廟靜攝講席久塵
臣子無所關其忠因與講官余繼登以通鑑分類註
解引古誼以傳時政凡治亂得失之故具陳其所以
然庶幾託於三百篇之旨因以諷諫焉戊子主試湖
廣已丑主武闈時倖賊之亂方作琦於策問中具言
虜賊陰媾并滅賊退虜之方縷縷幾千言後事平以
策中語覆之若持左券大都琦長于策略深諸故典

至憂君愛國一念雖七箸不能忘片楮單言語及時
政艱危未嘗不淫淫涕欲下也已陞禮部右侍郎聞
父病篤緣經筵舊勞以乞恩封并乞回籍 上允之
特 賜銀二十兩馳傳歸省歸甫八日而父病不能
起矣每泣語人曰 聖恩浩大此八日之養勝于三
公九鼎也服除爲纂脩國史總裁辛丑爲會試主考
尋陞吏部尚書琦之爲吏部也一以獎廉抑競爲念
每月首序次循資銓陞者粘列後堂之壁遇缺挨次
以補吏胥毫不得恣其罔而請託者亦無所容其私
凡言官抵觸 上怒特旨下吏部降調謫削無不殫

力救援 上亦屢賜優容焉蓋琦以陸宣公之忠憤而託于子輿氏之婉諭所陳諫疏不激不隨深識大體故雖以言路金鬲之際諫冊立諫豫教諫御朝講親郊廟請冠請婚沮三王並封之典不行皆 上所最不悅者而竟未一加譴責也歲壬寅而疾作請告至二十餘疏閣臣代爲請者亦四五上終不得 俞旨未幾卒于京一切祭葬卹賻皆加隆焉